

Un otro "Bon Trabao" bisto pa tur hende

Minister Mike de Meza ta expresa elogio pa renobacion y ampliacion di e edificio di Corte



ORANJESTAD (AAN): Di ahuebs mainta a tuma luga e firmamento di dos contract na edificio di Corte, cual ta completa e trabaonan cu a worde haci na e edificio historico den centro di Oranjestad.

Minister di Finansa, Comunicacion, Utilidad y Energia, Ing. Mike de Meza a firma e contractnan pa e proyectonan cu a worde financia pa FDA, hunto cu Minister di Husticia y Enseñansa, mr. Drs. Arthur Dowers den presencia di Minister di Salubridad y Deporte dr. Richard Visser. E contractnan ta encera un inversion di Afl. 1.3 miyon den e sistema di siguridad, cual ta worde efectua pa Croon Caribe y un inversion di Afl. 2.4 miyon pa e decoracion y mueblenan, cual ta na encargo di Office Systems.

Minister De Meza a expresa elogio pa e trabao excelente cu a worde haci pa Van Kessel Construction bao di guia di Monumentenbureau cu asistencia di Monumentenfonds.

"Mi ta sinti mi hopi orguyoso di ta parti di e gobierno cu a bin ta rescata infraestructura den su totalidad na Aruba, Minister Mike de Meza a bisa, gradiciendo tur e gruponan di interes, o sea stakeholdernan, cu a participa sea directamente of indirectamente como sub con-

tratista na e proyecto.

E mandatario a comenta cu e tin un aprecio grandi pa su coleganan, mencionando den e caso aki specialmente Minister Dowers como esun encarga cu husticia; Minister Benny Sevinger, como e arkitecto di e gobierno pa cu tur proyecto di infraestructura y el a subraya e liderazgo di Minister Presidente Mike Eman.

"Nos tur ta un team," Minister De Meza a bisa enfáticamente, añadiendo "Asina so bo por haci'e. Ora bo traha cu un team bo ta haci trabaonan grandi manera nos a bin ta haciendo."

Minister De Meza a bisa cu orguyo, cu e expansion y renobacion, awe nos Corte ta worde eleva pa e nivel cu e mester ta, un nivel respetabel. El a splica cu Minister Dowers a elabora tocante e mal estado cu e edificio di Corte tabata aden anteriormente, unda cu hasta ladroncia tabata tuma luga for di pafo y awo esaki ya no ta posibel mas cu e siguridad cu a worde adapta y modernisa pa asina garantisa e integridad di e institucion importante aki. Asina e gobierno actual, segun Minister De Meza, ta bin cu solucionnan structural pa problemanan cu structuralmente a existi pa hopi aña na Pais Aruba.